

# Muossar eir opticamaing la buna cumünanza

L'OJ Motta Naluns Scuol ha survigni nouva büschmainta

**L'OJ Motta Naluns Engiadina Bassa Scuol es ün'organisaziun independenta chi suottasta al Club skiunzs Lischana Scuol. Ella s'occupa pel sport da skis alpin per uffants e giuvenils pels clubs da skis Zernez fin Martina.**

L'Organisaziun per juvenils (OJ) Motta Naluns Scuol prouva da nüzziar sinergias tanter ils clubs da skis da Zernez fin Martina ed es gnüda fundada avant divers ons per sustgnair il sport da skis alpin per uffants e giuvenils. I nu's tratta d'üna societä e perquai nun existan neir ingüns statüts.

Il manader da l'OJ Motta Naluns Scuol es Rico Stuppan da Ftan. El maina l'organisaziun insemel cun trenadoras e trenaders da la regiun. Quels praistan indombrablas uras gratuitas per instruire e manar ils giuvenils.

L'organisaziun sustegna ils interess dal sport da skis alpin publicamaing in Svizra ed i' ester ed es eir üna part generala da la societä. Ils böts sun da sustgnair ils clubs da skis da l'Engiadina Bassa pro la scolaziun dal sport da skis alpin, ameglrdar la cundiziun corporala ed il savair tecnic, il tour part a cuorsas naziunalas ed internaziunalas ed eir fuormar la cumpetenzia sociala pro'l sport, scoula e plü tard pro la lavur.

## Büschmainta nouva pels scolars

L'OJ Motta Naluns Scuol suottasta al Club da skiunzs Lischana Scuol ed es dependent da sponsuors chi sustegnian lur böts in möd generus. D'incuort s'han chattats il manader da l'organisaziun OJ Motta Naluns Scuol cun trenadoras e giuvenils pro Jon Sport a Scuol per retrar la nouva büschmainta da



Ils uffants han plaschiar da lur dress nouv. L'organisaziun OJ Motta Naluns Scuol ha ün nouv logo. Il material da trenamaint ha la OJ insemel culs clubs da skis da Scuol, Ftan e Sent.



Il material da trenamaint ha la OJ insemel culs clubs da skis da Scuol, Ftan e Sent. (grafias: Benedict Stecher)

skis. In venderdi passà regnaiva aint illa butia da Jon Sport a Scuol ün grond travasch. Fin cha minchün vaiva chattä sias chotschas e giacca illa dretta grondezza ha quai vuglù bier.

Il manader da l'OJ Motta Naluns, Rico Stuppan, e seis agüdants vaivan ils mans plains per accumplir a mincha giavüsch. «L'organisaziun pel sport da skis per giuvenils dispuona da 18 manadoras e manaders chi lavuran per ün grazcha fich e praistan üna gronda la-

vur. Material da trenamaint vain nus insemel culs clubs da skis da Scuol, Ftan e Sent.»

## Avantags per retrar material

Stuppan disch cha per tour il temp pro cuorsas as stöja avair firmas chi fan quai professionnalmang e sun licenzchadas causa chi va impustü eir per puncts chi van sur Swiss-Ski e chi han per consequenza cha ün o'oter gniss in üna categoria plü ota.

«Per retrar artichels da sport plü favuraivel vain nus convnegnas cun affars da skis e da sport chi dan tscherts rabats, listess es quai cullas Pencilaras Scuol SA chi spordschan cartas da stagiun per predchs favuraivels», disch Rico Stuppan. Plü bod vaiva mincha club üna OJ ed uossa sun quels fusiunats suot il patronadi dal Club da skiunzs Lischana Scuol. «Nus vain mincha sonda trenamaint o cuors. Ils plü pitschens sun integrats illa gruppa Globi ed ils gronds

fin novavla classa in differentas gruppas», declera il manader.

«La gruppa da cuorsas ha implü il marcurdi trenamaint. Nus ans finanziain tras sponsuors ed otras instituziuns chi sustegnian nouva lavur generusamaing. Ils genituors dals sportists ston eir surtour ün import da tanter 100 e 200 francs per stagiun.» Sainza quels sustegns nu füssa pussibel da pudair spordscher als uffants ün trenamaint professional. (anr/bcs)

## Ils «4 for you» han fascinà il public a Zernez

Ün concert «extraordinari e da prüma classa»

**Il concert cha'ls quatter chantaduors da la gruppa chi chanta a capella, «4 for you», han dat in sonda, ha pisserà illa baselgia a Zernez per pel giallina. L'acustica - mo impustüit lur chant - ha fat impreschiun.**

Eir ils quatter chantaduors Jon Armon Strimer (tenor), Martin Stecher (tenor), Duri Stecher (bass) e Hannes Pfranger (bariton), tuots oriunds dad Ardez sun gnüts plü vegls e plü madürs. Quist fat chaschuna pro els però, cha lur vuschs sun dvantadas amo plü nettas, plü fermas e fascineschan eir amo hoz ad ün vast public.

«Tanter novas chanzuns chantaina eir chanzuns cha nus chantaivan plü bod», disch Jon Armon Strimer. Ch'els hajan però glimà vi da quellas preschantaziuns, fat adattamaints ed as possan uossa preschantar in oter möd. «Nus eschan plü madürs e cun nus s'ha eir nos chant sviluppà», manaja'l.

## «Chant chi va simplamaing a cour»

Da dudir chant in baselgia fa adüna impreschiun. «Però da dudir il chant da quists quatter hommens es simplamaing i a cour», ha mania üna duonna chi ha sco tuot il public, il qual ha occupà la baselgia da Zernez fin sün l'ultima piazza, giödü il concert bain ün zich insolit. «Da dudir uschè bellas chanzuns be chantadas, sainza accompagna-maint dad instrumaints, es special e fa impreschiun», ha'la conclud. Mo eir ils quatter chantaduors han gnü grondas emoziuns ed impreschiuns chi tils re-



Ils quatter chantaduors Jon Armon Strimer, Martin Stecher, Duri Stecher e Hannes Pfranger, tuots oriunds dad Ardez, s'allegran cuort avant lur concert a capella illa baselgia gronda a Zernez. (grafografia: Martina Fontana)

staran sgüra in bun'algordanza. «Nus eschan fingiä its a Zernez cun grond plaschiar e nus avain giödü fich ferm da pudair ans preschantar darcheu üna vouta in patria», tira Jon Armon Strimer bilantsch. Sumgliaints sentimentais hajan els eir pudü giödar be d'incuort in dond ün concert illa baselgia «Heiligkreuz» a Cuoria. Chi nu saja però mai il listess schi's concertescha in Engiadina o in oters lös, agiundscha'l.

## Posas plü lungas

Ils quatter chantaduors da «4 for you» nu concerteschan regularmaing e quai

es tenor Jon Armon Strimer eir il motiv chi da adüna darcheu posas plü lungas tanter ün concert e tschel.

«Nus vain adüna darcheu incumbenzas da quä e da là, mo üna regularità da concerts gronds nu daja pel mumaint», disch Jon Armon Strimer. Chi saja uschè cha tuots quatter commembers da la gruppa da chant a capella sajan intant baps da famiglia e cha las prioritats da lur vita as concentreschan eir sün quai.

Pel concert a Zernez ed avant a Cuoria han els exercit intensivamaing ed inscuters regulars sajan stats evi-

daints. «Intant esa però uschè cha nus ans inlegiaim sainza gronds plets e perquai sun eir nos exercizis adüna ün grond plaschiar e na be lavur e stuvair», declera'l cun tschera iainta.

Da's pudair preschantar al public saja però amo adüna mincha vouta ün evenimaint special e cha perquai hajan els eir adüna grond plaschiar da gnir ingaschats, disch Strimer e s'allegra sün ün prossem concert extraordinari.

Martina Fontana

Ulterioras infuormaziuns dals «4 for you» as survain silüa pagina d'internet: [www.4foryou.ch](http://www.4foryou.ch)

## «Threema» - app da chat rumantscha

**Rumantsch** Threema es l'alternativa svizra a WhatsApp cun passa 4,5 miliuns utilisaders. Uschè es quai il servezzan da novitats sgür ch'i'd es il plü dera-sà sül marchà. Al listess mumaint es quai la prüma app da chat rumantscha.

Na be in Svizra, ma eir in Germania es Threema fich popular. Che cha blers nu san: Threema es ün'interpraisa dal tuotafat svizra. Ella es gnüda fundada dal 2012 da trais giuvens sviluppaders da software a Pfäffikon SZ. Na be il domicil da la firma as chatta in Svizra, ma eir ils servers, e la software vain eir sviluppada qua. Roman Flepp es il pledader da Threema e discuorra sves rumantsch. Seis idiom es il sursilvan.

Fingia daspö ün temp es Threema disponibil illas trais linguas naziunalas svizras tudais-ch, frances e talian. Nouv vain sustgnüda culla versiun rumantscha eir la quarta lingua naziunala.

La firma Threema disch «Allegra rumantsch!». La traducziun per l'app es gnüda realisada in collavuraziun culla Lia Rumantscha chi s'ingascha pella promozion ed il mantegnimaint dal rumantsch. L'app es in Rumantsch Grischun.

Che distingua Threema d'oters servezzans da novitats? Threema nu ramassa ingünas datas d'utilisaders e codescha l'intera comunicaziun cul plü ferm criptadi pussibel. Uschè nu po ingüna persuna na autorisada leger las novitats.

Il servezzan da novitats es gnü distingüi fingiä plüssas jadas per seis standard da sgürezza extraordinari e sia simplicità da dovrar pels utilisaders. Cün «Threema Work» spordscha l'app Threema nov eir a firmas üna soluzion per trametter e tschüffer novitats. (pl)

Per ulterioras infuormaziuns: [www.threema.ch](http://www.threema.ch)